

# BOKUNDAMI



Tata Mopambolami na Likolo, elongo ná—ná Bozali ya Molimo Mosanto oyo asili kozala awa, tozali kobeleva na Liloba Mosanto na Yo. Mpe atako ná mongongo mabe nazomeka komipekisa, mpe koloba maloba na malembe mpe kimia nyonso ndenge nakokoka, Nazali kosenga bokambami ya Bonzambe na Yo mpe kopakolama ya Molimo Mosanto ésala katikati na biso na mpokwa oyo. Mpe tika ete Ye Oyo azali na-bisika-nyonso, tika ete Ázwa Liloba na Nzambe mpe Ápesa Yango na motema moko na moko, kaka ndenge tozali na bosenga. Tika ete Áleisa biso na mpokwa oyo, na biloko malamú ya Nzambe.

<sup>2</sup> Mpe na mpokwa oyo, wana ezali biso kosolola na ntina na Liloba, tika ete mitema mia biso ékota ba-kilometre ebele kati na Kalvari, epai wapi Yesu afutaki motuya ekoki na mobimba oyo esengamaki na bisambisami minene ya Nzambe, longwa na Elanga na Edene. Mpe lelo tika ete tóyeba ete tolóngisami ofelé na nzela ya lisekwa na Ye, mpe na nzela ya kufa, kokundama, mpe lisekwa na Ye.

<sup>3</sup> Mpe na mpokwa oyo, tozali lisusu baoyo ya mokili te, mpo tosili kosómbama na ntalo ya Makila ya motuya ya Mwana na Nzambe. Mpe tika ete biso, ná mitema ya matondi, tóbaluka epai na Yo na mpokwa oyo, ná makanisi mpe makasi nyonso, ná oyo tozali na yango na kati na biso, mpe tósalela Yo na motema mpeto, oyo ezangi mbindo.

<sup>4</sup> Sala ete na mpokwa oyo, Tata, soki esali ete bato mosusu bazali awa oyo bayebi Yo te, na bolimbisi ya masumu na bango, tika ete bákoka koya na mpokwa oyo na komikitisa na ekulusu, mpe kuna báyambola masumu na bango epai na Nzambe oyo azali sembo, mpo na kolimbisa. Mpe tika ete oyo ézala mpokwa monene mpo na biso nyonso. Tosengi yango na Nkombo ya Mwana na Yo, Nkolo Yesu. Amen.

<sup>5</sup> Sikoyo toyebi ete ezali na moto moko te, na mabelé, oyo akoki kozwa Liloba na Nzambe mpe komonisa Yango, mpamba te Liloba ekomami na nzela na mpémélá. Molimo Mosantu azali Mokomi ya Liloba.

<sup>6</sup> Mpe ntango moto moko alukamaki, na Likolo, mpo na kozwa Buku mpe kofungola Bilembo, moto moko te azwamaki na Likolo, to na mabele, to na nsé na mabele, oyo alongobanaki mpo na kofungola Bilembo yango, to ata kotala Buku yango. Mpe ezalaki na Mwana-mpate moko Kuna oyo abomamaki longwa na kozalisama na mokili, Ye ayaki mpe azwaki Buku na loboko na Ye oyo afandaki likolo na Ngwende, mpe afungolaki Bilembo yango mpe afungolaki Liloba.

<sup>7</sup> Mpe tozali na mpokwa oyo kondima mpe kotiela Ye motema, ete Akofungola Liloba mpo na biso, mpe sikawa, wana nazotángá na mokapo ya 2 ya Misala.

<sup>8</sup> Ndenge nalobaki, mpokwa ya liboso ezalaki likolo na *Boyei Ya Mibale*, mpe . . . ya Nkolo Yesu, lokola ezalaki mokolo ya Misato. Mpe mokolo ya Minei na mpokwa ezalaki likolo na *Mbeka Oyo Ekoki-Na-Nyonso*. Mpe mokolo ya Mitano na mpokwa likolo na *Mbondi Oyo Ekoki-Na-Nyonso; Oyo Abongi Be*. Bososolaki yango lobi na mpokwa? *Oyo Abongi Be*, ndenge tokoki kozala mpenza kozanga mpámélá mpe ya kobonga be na miso na Nzambe! Mpe na mpokwa oyo ezali *Bokundami*. Mpe lobi, *Lisekwa*. Kaka ndenge mikolo yango ezolandana.

<sup>9</sup> Sikoyo naponaki na mpokwa oyo, mpo na litangi na ngai ya Likomi, longwa na Buku ya Misala, mokapo ya 2 mpe milongo ya 25, 26, ná 27, mpe lokola. Mpe Etángemi boye, Petelo moto azoloba.

*Dawidi, mpo ete Dawidi alobaki na ntina na ye ete, Nazali kotala Nkolo liboso na ngai ntango nyonso, mpo ete azali na loboko na ngai ya mobali, ete náníngana te:*

*Yango wana motema na ngai esepeli mpe lolémo na ngai ezali na esengo; mpe nzoto na ngai ekojila na elikia:*

*Mpo ete okotika elimo na ngai na ewelo te, mpe okotika te Oyo na Bulee na yo komona kopola.*

<sup>10</sup> Oyo litangi moko kitoko mpo na mpokwa oyo, mpo na kozwa maloba oyo etali kozala na Ye kati na nkunda.

<sup>11</sup> Eloko ya liboso tolingi kotala . . . kobenda bokebi na bino, ezali kozanga kokwea ya Liloba na Nzambe. Nzambe abatelaka Liloba na Ye, moko na moko. Mpe na mpokwa oyo tolingi kotia mpenza makanisi na biso likolo na yango, ete Nzambe abatelaka Liloba na Ye. Tokoki kopéma mpenza na elikya ete oyo nyonso Nzambe asili koloba na Liloba na Ye, ezali Solo. Mpe kondima epemaka te likolo na zelo ya koningana ya makanisi ya moto to theology ya moto, kasi ezali na epémelo na yango ya suka likolo na Libanga ya Liloba na Nzambe ya Seko oyo eninganaka te.

<sup>12</sup> Liloba! Soko Nzambe asili koloba yango, ezali Solo mpo na libela. Akoki kolongola yango te mpo na koloba, “Nalingaki koloba bongo te.” Nakoki koloba makambo mpe okoki koloba makambo, na sima tokoki mpe kowangana yango, mpo tolobaki yango na boyebi na biso nyonso mpe na makoki na biso ya malamú koleka. Kasi, na bongo, Nzambe akeseni na biso mingi mpenza. Azangi suka, na yango Alobaka eloko moko te kaka soki ezali mpenza oyo ebongi be. Ye atikálá kozongela yango ata mbala moko te, atikálá ata moke te kosenga bolimbisi mpo na likambo oyo Alobaki. Etikalaka ntango nyonso bongo, Bosolo.

<sup>13</sup> Ata mpo na Yesu, na mikolo ya motuya oyo, tozali kosepela na yango, ntango Nzambe abomaki Mwana na Ye mpo na

masumu ya mokili, ezalaki ntango mosusu mibu nkóto na nkóto liboso kutu mobóko ya mokili étikala kotiamana. Nzambe alobaki Liloba, mpe Ezali mosala oyo esílí kosalema na Likolo ntango Nzambe alobi yango; yango esili kosalema. Oh, soki tokokaki bobele kososola eloko nini yango elingi koloba, bato ya bokesene nini oyo tolingaki kozala! Komona kati na ba-Buku na Ye, ba-kosambisama oyo etiami awa mpo na kozanga botósi, ekosala ete moto ámitala ye moko, ngonga na ngonga; mpe ekosala ete moyengebeni ásepela, ngonga na ngonga, mpo na kotanga mapamboli oyo Nzambe asili kolaka na mosémbwi. Mpe tokoki kozala na kondima mpenza ete liloba moko na moko ekokokisama, kofandisa elimo na biso lokola lóngo likolo na yango. Ezalaka ntango nyonso lolenge wana.

<sup>14</sup> Ntango Nzambe asololaki na Noa, kala kala, liboso na mikolo ya mpela monene; ntango mosusu liboso ete Biblia moko étikala kokomama, to Biblia oyo, ata bongo, étikala kokomama; Nzambe ayebisaki Nowa ete ekúmbaki moko ezalaki koya, mpe mai ekozisa mabelé. Mpe ata mwa eloko moko te ya kolakisa ete ekosalema, makambo nyonso ezalaki ya kokesene mpenza, Noa atambolaki na kobanga, mpe atongaki masuwa, abongisaki yango. Ezalaki mpo na lobiko ya libota na ye mpe ya ye moko. Nzambe atikaki ye ata moke te, mpamba te ezalaki Liloba na Ye. Esengelaki kosalema ntango Nzambe alobaki ete ekosalema.

<sup>15</sup> Sikawa, ntango Yobo, Buku ya kala mpenza koleka na Biblia, oyo ekomámá ntango mosusu liboso Genese ékomama, mpe yango etiamaki kati na Biblia. Mpe Mose akomaki Genese. Yobo, na kati ya Buku na ye, apemaki na limemia nyonso likolo na elaka oyo Nzambe apesaki ye. Mpe atelemaki na mbeka na ye ya kotumba, kozanga kobanga na motema na ye; koyebáká ete, oyo Nzambe asilaki koloba, Nzambe azalaki na makoki ya kosala yango. Mpe ntango makambo nyonso emonanaki lokola kokesene, Yobo atelemaki ngwi mpamba te elaka na Nzambe etelemaki ngwi. Nzambe alakaki Yobo, mpe Yobo apemaki likolo na elaka yango.

<sup>16</sup> Oh, soki lingomba ekokaki mpenza kokóma na esika wana epai oyo ekokaki kopema na limemia nyonso likolo na Liloba ya Seko ya Nzambe oyo ezali Bosolo! Bokeseni nini oyo ekozala, kosembolama nini oyo ekozala, kolongolama nini oyo ekozala, esengo nini oyo ekozala, nguya nini oyo ekozala, ntango mibali mpe basi bakotiela Nzambe motema mpenza, oyo Ye alobaki ezali Solo. Etali te ndenge oyo makambo ékomonana, yango etali yango na likambo moko te. Nzambe alobaki bongo; yango ekati likambo!

<sup>17</sup> Mpe Yobo, ntango azalaki na ntango makasi koleka ya komekama na bomoi na ye mobimba; ntango azwamaki, liboso na Bozali na Nzambe, moto na sembo. Ata Nzambe alobaki ete ye abongaki be. Moto moko te azalaki lokola ye na mokili. Mpe

Satana apesamaki litómba ya komeka ye, koloba: “Nakosala ete ye átuka Yo na miso na Yo.”

<sup>18</sup> Mpe akomaki pene ya kolongola bomoi ya Yobo, mpe akokaki kosala yango, kasi Nzambe atiaki mondelo, alobaki, “Okoki kosala ye eloko nyonso, kasi kolongola bomoi na ye te.”

<sup>19</sup> Na bongo ntango Yobo akomaki na ngonga makasi mpenza ya komekama, alobaki, “Nayebi ete Mosikoli na ngai azali na bomoi, mpe na mikolo ya suka Akotelema na mokili. Ata nkusú elei nzoto oyo, kasi na mosuni na ngai, nakomona Nzambe.” Ata molili ezali komonana ndenge nini, ata emonani lokola ekoki kosalema te, eloko moko ezalaki lóngo oyo Yobo akangisaki elimo na ye na yango, elaka ya Seko ya Nzambe. Oh, soki tokokaki bobele kosala yango! Bótala, apemaki likolo na elaka yango, “Nayebi ete Mosikoli na ngai azali na bomoi.”

<sup>20</sup> Mpe nalingi bómona, mpo na maloba makoya na sima nalingi koloba ete, Yobo alobelaki mpenza esika na ye ya kokundama. Mpe ntango Yobo akufaki, akundamaki bongo.

<sup>21</sup> Ezalaki na moto mosusu, na nkombo na Abraham, oyo azwaki Nzambe na Liloba na Ye. Mpe andimelaki Nzambe. Mpe abengaki biloko oyo ekesenaki na elaka Nzambe apesaki ye, lokola ete ezalaki te. Azwaki Nzambe na Liloba na Ye. Mpe ntango mikolo elekaki, mpe ba-mposo ná ba-sanza, kutu mpe mibu mpe elekaki, ekokaki koninganisa Abraham ata moke te. Biblia elobaki, “Atengáténgákí te, na kozanga kondima, na elaka na Nzambe; kasi azalaki sembo, apesaki Nzambe masanzoli.”

<sup>22</sup> Ntango makambo nyonso emonanaki lokola, mokolo na mokolo, ekobaki bobele kokóma mpasi koleka mokolo na mokolo; kasi na esika ya kolemba koleka, Yobo akomaki nde makasi koleka mokolo na mokolo. Oh, elikya epambolami nini oyo tozali na yango! Ntango kokoso ezali kotelema mpo na kokómisa likambo yango, oyo Nzambe alakaki, lokola likambo oyo ekoki kosalema te, na esika ya kozanga molende, kozonga na mokili, tosengeli nde kotelema ngwi koleka ndenge totikálá kotelema, likolo na YANGO ELOBI NKOLO. Yango esengelaki kokata likambo, ntango Nzambe alobi eloko moko.

<sup>23</sup> Mpe Abraham abengaki biloko oyo ezalaki, lokola ete ezalaki te, mpo yango ekeseneki na Liloba. Mpe ntango Abraham abungisaki mwasi mpe bolingo ya motema na ye, Sara, sima na mibu ebele ya kobika elongo, asombaki eteni ya mabelé pene na esika oyo Yobo akundamaki, mpe akundaki Sara. Bokomituna mpo na nini? Bazalaki basakoli! Bamonaki! Bakutanaki ná Nzambe! Mpe sikawa, ntango Abraham akufaki, akundamaki elongo ná Sara.

<sup>24</sup> Sikawa, alingaki te ete bato oyo bákabela ye eteni ya mabelé wana. Asombaki yango, liboso na batátoli. Elilingi moko kitoko ya libatisi. Asombaki yango liboso na batátoli, ete ezalaki bozwi na ye. Oh, ndenge wana nde mondimi ya solosolo asengeli koya,

ezali te koselimwa na litúmu, kasi kotelema liboso na batátoli, “Nazali motatoli ya Nkolo Yesu, mpe ya Molimo Mosantu, mpe ya misala minene na Ye,” mpe koleka lisusu mpenza wana ezali biso komona mokolo mabe oyo kobelema.

<sup>25</sup> Na bongo ntango mwana na Abraham, oyo azalaki Isaka, elaka esengelaki kopesamela ye. Mpe ntango Isaka akufaki, akundamaki elongo ná Abraham. Mpe Isaka abotaki Yakobo.

<sup>26</sup> Mpe ntango Yakobo azalaki . . . akufaki kuna na Ejipito. Kasi bótala, liboso ákufa, alobaki na mwana na ye mosakoli, Yosefe, “Yaka awa, mwana, mpe tia loboko na yo likolo ya ebelo na ngai ya kotenguma.” Mpo bókanisa lisusu ndenge oyo akomaki moténgumi, ezali mpo Mwanje na Nkolo amamáki ebelo na ye, abandaki koténguma kobanda mokolo wana. Alobaki, “Tia loboko na yo likolo na ebelo na ngai, mpe katela ngai ndai na Nzambe ya batata na biso, ete okokunda ngai awa na Ejipito te.” Mpo na nini? Oo, bazalaki na Liloba, bazalaki na emoniseli!

<sup>27</sup> Mpe tika nátelema awa, mpo na koloba ete lingomba ya Nzambe na bomoi etongami likolo na emoniseli ya Nzambe; likolo na denomination te, bibongiseli te, likolo na malako to mateyo te, kasi likolo na Solo ya Nzambe na bomoi oyo emonisami na molimo.

<sup>28</sup> Abele, na elanga na Edene, azalaki na yango ntango lingomba ebandaki. Ndenge nini ayebaki ete esengelaki komema mwana-mpate? Mpo na nini amemaki mbuma te lokola Kaina asalaki? Kasi yango emonisamelaki ye!

<sup>29</sup> Yesu na ntango moko azalaki koloba, alobaki, “Bato bazali koloba ete Ngai Mwana-na-moto Nazali nani?”

“Bamosusu balobaki ete Ozali ‘Mose,’ mpe ‘Eliya,’ mpe bongo na bongo.”

Alobaki, “Kasi bino bolobi ete Nazali nani?”

<sup>30</sup> Bomoni, epémaka te likolo na oyo moto mosusu akanisaka, ezali oyo yo oyebi ete ezali Solo. “Nini *bino* bolobi?” Motuna wana ekoki kotunama sémba na moko na moko na biso na mpokwa oyo: “Nini bino bolobi?”

<sup>31</sup> Mpe Petelo ayanolaki nokinoki, zángá kotatabana, alobaki, “Yo ozali Klisto, Mwana na Nzambe na bomoi.”

<sup>32</sup> Lokola Yesu Oyo ayebaki sekele ya mitema nyonso, mpamba te Azalaki moto mosusu te bobele Yawe amonisami kati na mosuni, mpe Alobaki, “Esengo na yo, Simona, mwana na Yona, mpo ete mosuni mpe makila emonisi yo likambo oyo te, kasi Tata na Ngai oyo azali na Likolo nde asali likambo oyo. Mpe likolo na libanga oyo Nakotonga Lingomba na Ngai, mpe bikuke na ewelo ekoki kolóngá liboso na Yango te.”

<sup>33</sup> Mpe biso bato wana tozali kokóba, biso ba-Lutheran tolingaka kotambola na kondima, biso ba-Methodiste tolingaka kogángá mpo na kozwa Yango, bino ba-Pentecotiste, bolingaka

koloba minoko ya sika mpo na kozwa Yango, kasi oyo wana ezali na ba-kilometre milió zomi mosika na Yango.

<sup>34</sup> Ezali emoniseli ya Bonzambe ya Nkolo Yesu Klisto, Bomoto ya Bozali na Ye oyo emonisami kati na motema, “Likolo na libanga oyo Nakotonga Lingomba na Ngai, mpe bikuke na ewelo ekokoka kolóna liboso na Yango te.” Etámbolaka malamú be elongo ná Matai:24, 5:24, to, Santu Yoane 5:24, “Ye oyo akoyoka Maloba na Ngai, mpe akondima Ye oyo atindaki Ngai, azali na Bomoi na Seko; mpe akokoma na esambiseli soko moke te, kasi asili kolongwa na kufa mpe koiingela na Bomoi.” Ezali te mpo ozwaki koningana moko, kotuntuka moko, kasi ezali mpo ozwaki libaku malamú ya kozala na Klisto oyo amonisami epai na yo longwa na Likolo, “Likolo na libanga oyo Nakotonga Lingomba na Ngai.”

<sup>35</sup> Mpe na bongo, Yakobo, ntango akufaki, mwana na ye amemaki nzoto na ye, mpe akundamaki elongo ná Abraham, Isaka, Sara, mpe Yobo, na Mabelé Mosanto, na Palestina.

<sup>36</sup> Na sima, Yosefe, lokola mosakoli. Afulukaki na Ejipito. Ayebaki Nzambe. Nzambe Amimonisaki na ye. Mpe ntango akufaki, alobaki, “Bókunda mikuwa na ngai awa te, kasi bótia. . . ntango. . . Mokolo moko Nzambe akoya solo epai na bino!” Mpo na nini? Azalaki kotelema ngwi likolo na Liloba na Nzambe epai na Mose, “Mbula nkama minei bakosalela ekolo oyo, kasi nakobimisa bango.” Atelemaki mpenza likolo na Liloba.

<sup>37</sup> Mpe oyo mpenza etaliseli moko kitoko, soki bokomona yango. Mo-Ebele nyonso oyo azalaki koleka wana, ná mokongo na ye ezokázoká na mpota, ya ba kapita ya baombo. Mpe ntango azalaki kotala mikuwa ya mosakoli na ye, Yosefe, ayebaki ete mokolo moko, bakobimáká. Mpamba te, mikúwa yango etikalaki wana lokola ekaniseli, ete mokolo moko bakobima.

<sup>38</sup> Eleki pene na mibu zomi na mitano to zomi na mwambe ntango Billy Paul, mwana moke pene na mibu mitano, ezalaki mpenza mpasi mingi. . . Tozalaki na mwa folólo moko oyo tozalaki komema na nkunda ya mama na ye, na ntongo-ntongo ya mokolo moko, na Pásika, kaka ndenge mói ezalaki kobima, kotána na petee; to liboso ntongo étana, ezalaki, na sima tozalaki kokende na losambo. Mpe wana tozalaki kokende kuna na nkunda, mwana moke oyo alongolaki ekoti na ye wana tozalaki kokende epai oyo leki na ye ya mwasi mpe mama na ye bakundamaki. Mpe abandaki koyoka mawa mpe kolela, mpe alobaki, “Tata, mama azali kuna na kati ya libulu wana?”

<sup>39</sup> Nalobaki, “Te, mwana. Azali kuna na kati ya libulú wana te. Azali na lolenge malamú mbala milio koleka yo ná ngai.”

Alobaki, “Nakomona lisusu mama?”

<sup>40</sup> Nalobaki, “Na ngolu na Nzambe, soki ozali na mposa yango, okoki komona ye lisusu.”

Alobaki, “Nzoto na ye ekobima longwa na nkunda oyo?”

<sup>41</sup> Nalobaki, “Cheri, kanga miso na yo, mpe nakoyebisa yo mwa lisolo. Eleki mibu nkama ebele, na ntongo oyo, ezalaki na nkunda moko oyo etikalaki polele.” Nalobaki, “Ezali ekaniseli mpo na ‘baoyo balali kati na Nzambe Klisto akomema bango elongo ná Ye ntango Akoya.’” Na ntembe ata moke te, natelempi mpenza likolo na elaka ya Seko ya Nzambe!

<sup>42</sup> Lokola Yobo ya kala, ntango toyokaka maloba oyo “putulú na putulú, mpe mabelé na mabelé,” ezali kokanisela ngai Longfellow, oyo alobaki:

Lobela ngai te, na mitango ya bileli,  
Bomoi ezali bobele ndoto moko ya mpamba!  
Mpe elimo esili kokufa oyo elali,  
Mpe makambo ezalaka te ndenge emonanaka.

Alobaki:

Iyo, bomoi ezali solo! Bomoi ezali ndangá!  
Mpe nkunda ezali suka na yango te;  
Mpo ete ozali putulú, okozonga na putulú,  
elobamaki mpo na elimo te.

<sup>43</sup> Bazali kobenga yango nzoto ya molimo, ete ntango tolongwe awa tozali kokende epai mosusu. Ézala soko nini, nazali kozwa Liloba ya ntoma, ntango alobaki, “Soki hema oyo ya mosuni to efandelo ebebi, tozali na mosusu oyo ezali kozela, kolongwa na *oyo* kino na *oyo* Wana.”

<sup>44</sup> Abraham, Isaka, Yakobo, Yobo, basakoli nyonso, batiaki motema mpe bandimaki ete lisekwa moko ezalaki koya, ete Mosikoli azalaki koya. Basakolaki na ntina na Ye. Enoka asakolaki na ntina na Ye; apemaki na elikya nyonso, akangaki yango ná elembo ya litatoli na ye. Isaka, Yakobo, Danyelee, Yilimia, Ejekiele, bapemaki na elikya nyonso likolo na ntango oyo Masiya akokaki koya.

<sup>45</sup> Mpe bakufaki mpe milimo na bango ekendeki na Paradiso. Bakokaki kokende liboso ya Bozali na Nzambe te, mpamba ete (tolobelaki yango lobi na mpokwa) makila wana ya ba-ngombe mpe ya ba-ntaba ekokaki kolimbisa masumu te; Ezalaki kaka kozipa masumu, kolobela na ntina na mokolo oyo ya mbeka ebongi be; mpamba te makila kati na nyama ekokaki kozonga epai na mosambeli te, mpamba te na boye alingaki kotika te kokaba mbeka ya motindo yango.

<sup>46</sup> Kasi ntango Mwana na Nzambe akufaki, Bomoi oyo ezalaki kati na Ye ezalaki eloko mosusu te bobele Nzambe, mpo na kozonga mpe kotia biso na lokumu ya bana kati na libota na Nzambe. Mpe sikawa tozali bana na Nzambe, Bomoi uta na Makila na Ye.

<sup>47</sup> Sikawa bóতালা nokinoki, wana tozokóba. Ntango kuna na kondimana na kala, mpe baoyo bandimaki mpe basambelaki,

mpe bakufaki kati na kondima, bazalaki kozela ntango yango, ntina oyo basakoli wana basalaki bongo, mpe balingaki kokundama na Palestina, bayebaki ete lisekwa ekozala na Ezipito te. Esengelaki kozala na Palestina, kaka.

<sup>48</sup> Yango wana nazali koloba na mpokwa oyo: Nazali na bantkombo ndenge na ndenge; etali ngai te oyo bato bazali kobenga ngai, yango elingi koloba eloko te mpo na ngai. Eloko bobele moko oyo nalingi kosala, ezali koyeba oyo: Nasili kokufa, mpe bomoi na ngai ebombami kati na Klisto, na nzela na Nzambe, mpe etiami elembo na Molimo Mosanto; ete ntango Akobenga longwa na bakufi, nakoyanola na mokolo yango. Bókunda ngai kati na Klisto, mpo baoyo bazali kati na Klisto Nzambe akoyeisa bango elongo ná Ye na mokolo wana.

<sup>49</sup> Tokotaka ndenge nini kati na Klisto? Bakolinti ya Liboso 12:13, “Na nzela na Molimo moko, biso nyonso tobatisami na Nzoto moko, mpe tokomi bandeko bana-mboka ya Bokonzi na Nzambe.” Totátolaka ete tozali baleki-nzela mpe bapaya na mokili oyo, tozali lisusu koluka biloko ya mokili oyo te, kasi tozotalela boyei ya Mokonzi oyo apambolami mpo na kozwa efandelo longwa na mbu moko kino na mbu mosusu ezingá suka, ntango Akoya na nkembo na Ye. Na ntembe te, tozali kozela Boyei na Ye.

<sup>50</sup> Na bongo, ntembe moko te ezali kati na makanisi na ngai, kasi yango nde eloko oyo Yesu azalaki na yango na makanisi na Ye ntango Azalaki awa na mokili, ezalaki kozanga kokweya wana oyo ya Liloba na Seko ya Nzambe. Mpamba te, toyebi ete kati na Ye litondi mobimba ya Bonzambe efandaki kati na Nzoto. Bonzambe mobimba ezalaki kati na Ye. Azalaki Tata, Mwana, mpe Molimo Mosanto, kasi afandaki na lolenge ya moto; theophanie ya Nzambe, elilingi monene ya Nzambe oyo Asalaki moto na yango, na sima Atiaki ye na mabelé. Azalaki na nzoto. Nzambe azangi nzoto te. Nzambe azali na nzoto, mpe yango emonanaka lokola moto. Mose amonaki yango, bato mosusu bananaki yango, mpe emonanaka lokola moto.

<sup>51</sup> Mpe ezali kaka etaliseli, oyo ezali, ya oyo Wana ezali. Mpe biloko nyonso na mokili, kitoko, elengi, kitoko ya mabelé, ezali eloko mosusu te na mokili bobele eyano ya oyo eleki yango mosika na malamumu koleka, oyo ezali kozela biso ntango tokotika mokili oyo. Mpamba te, eloko nyonso na mabelé ezali kaka elilingi ya oyo ezali na Likolo. Biloko nyonso oyo ezali malamumu, nyonso oyo ezali sembo, nyonso oyo ezali kitoko, banzete, bandeke, biloko nyonso, ezali kaka elilingi ya oyo ezali na Likolo.

<sup>52</sup> Bomoi na biso moko ezali bobele ndakisa. Ezali kaka elilingi, kasi eloko ya solosolo te. Ezali ngámbo ya mabe. Esengaka kufa mpo na kobimisa elilingi, mpo na kozongisa biso na theophanie oyo touti kati na yango. Na bongo na lisekwa tokoya na lolenge



moko ná Ye, nzoto oyo esekwi. Oyo kitoko mpenza; bobele kitoko te, kasi ezali mpenza Solo ya bonkumu ya Liloba ya Seko na Nzambe, ete tokozala lokola Ye.

<sup>53</sup> Bótala sikawa, Yesu, oyo atondisamaki ná ba-nguya na Nzambe nyonso, kasi, ntango akutanaki na Satana, Asalelaki ba-nguya na Ye ata moko te. Azalaki kaka kozóngá na Liloba! Asalaki bongo. Alobaki, “Ekomami, ‘Moto akobika bobele na lipa te, kasi na Liloba nyonso ekobimaka na monoko na Nzambe.’”

<sup>54</sup> Na bongo ndenge nini okoki koloba ete okoki kotikala na ndako mpe kozala Moklisto malamú kaka ndenge okokaki kozala na losambo? Okoki kosala yango te. Tángaká Liloba! Molimo Mosanto aliaka Liloba. Biblia ezali bilei ya molimo ya Nzambe mpo na Lingomba na Ye. Mpe Molimo Mosanto azali Ye Oyo azali komemela yo Yango mpe atii Yango na motema na yo, mpe ná kozongisáká matondi ndé ozali komwangisela Yango mái. Mpe elaka nyonso ya Nzambe ekobota mpenza likambo oyo Nzambe alobaki ete yango ekosala. Esengeli na yango. Ezali Liloba na Ye, mpe Ezali Bomoi.

<sup>55</sup> Sikawa, nabosanaki ete esengelaki názwa kaka ndambo ya ngonga. Ezwi ngai ntango molai mpenza mpo nákoma na oyo nalingi koloba.

<sup>56</sup> Kasi bótala, Yesu na ngonga ya suka, to ngonga mibale, ya bomoi na Ye, masakoli ebele, ebele, ekokisamaki.

<sup>57</sup> Moto moko alobaki na ngai, “Ndeko Branham, likambo *oyo* esengeli kosalema, mpe likambo *oyo wana* esengeli kosalema.”

Nalobaki, “Ekoiki kosalema na ngonga moko.”

<sup>58</sup> Soko botángi Nzembo ya 22, mpe na sima bótala ngonga ya kokufa na Ye na ekulusu, Nabosani nde sikawa masakoli boni ya kafukafu ekokisamaki na ngonga mibale to misato ya suka ya bomoi na Ye! Solo mpenza, “Batoboli makaka na Ngai mpe matandu na Ngai. Nzambe na Ngai, Nzambe na Ngai, mpo na nini Otiki Ngai?” mpe bongo na bongo, ndenge Dawidi agángaki.

<sup>59</sup> Mpe na bongo eloko mosusu oyo nalingi ete bómona, Bosolo, ngámbo ekweyaka te ya Liloba na Nzambe. Biblia elobaki, “Akobatela mikuwa na Ye nyonso, moko na yango te ebukani.” Mpamba te na elilingi, mwana-mpate ya Pásika azalaki elilingi na yango. Mwana-mpate asengeli kozanga mpamélá, mokuwa ya kobukana moko te esengeli kozwama kati na mwana-mpate. Mpe na ngonga oyo ntango Azalaki . . . Asilaki kokufa, bakendeiki mpo na kobuka makolo na Ye ná nzondó. Mpe kaka liboso . . . Bótala na ngonga wana mpenza-mpenza! Moto oyo azalaki na nzondó, amilengelaki mpo na kobeta makolo na Ye, kasi Liloba na Nzambe elobaki, “Mokuwa moko te ekobukana kati na nzoto na Ye.”

“Ekosalema ndenge nini?” Tozokoba noki-noki.

<sup>60</sup> Liloba na Nzambe ezali Seko! Soko Liloba na Nzambe ezali ya kobonga be bongo, baoyo bazali kati na Klisto bandimisami mpenza ete bakosekwa kaka mpenza ndenge mpe lisekwa ezali. Nzambe azali na lotómo na Liloba na Ye, mpo na kobikisa yo na nzoto, ndenge Ye azali mpo na kobikisa yo na molimo. Mpamba te, Ye, ezali Liloba na Ye nde elakaki yango. Ezali Liloba na Nzambe, mpe tozali na ndingisa moko te ya kolongola na Yango. Kasi bóloba kaka, “Ezali Solo.” Bóndima Yango! Ata soko nini ekokóma, bóndima Yango, ata bongo. Ndenge wana nde bango nyonso basengelaki kondima yango, mpe biso tozali libanda ya likambo yango te. Nzambe apesaki Palestina na Yisraele, kasi basengelaki kobunda mpo na eteni moko na moko ya mabelé oyo bazwaki. Elaka ezali ya yo, kasi osengeli kobunda mpo na eteni moko na moko ozali kosenga; zabololo akolandela yango, na ntembe te akolandela.

<sup>61</sup> Kasi bótala, ntango babelemaki mpo na kobuka makolo ya Nkolo na biso Yesu, soko nzondó yango ébetaka makolo na Ye mpe ébukaka yango, mbele Nzambe alingaki kozwama na lokuta. Kasi motango ata boni ya ba-zabololo kati na molili nyonso ya bolozali ekokaki te mpo na kotika ete nzondó wana ébeta nzoto ya motuya wana. Mpamba te Dawidi, mibu nkama mwambe liboso na yango, alobaki, “Mokuwa moko te ekobukana kati na nzoto na Ye.” Liloba na Nzambe esengeli kotelema Solo.

<sup>62</sup> Kasi basalaki nini na ntango yango? Bazwaki likonga mpe batobolaki mopanzi na Ye, mpe Makila ná mái ebimaki, mpo na kokokisa oyo Biblia elobaki: “Batoboli matandu na Ngai mpe mopanzi na Ngai.” Liloba ekokisamaki.

<sup>63</sup> Sikoyo ntango Ázalaki kokufa, oh, oyo ngonga ya nsómo mpenza! Nazali kokanisa na ntina na nzembo wana, mpe, na bosembo, eyokisaka ngai sómo mpenza, ntango nakanisaka nzembo wana oyo moyemi akomaki mbula mingi esili koleka:

Kati na mabánga ya kopasuka mpe likoló  
koyinda,  
Mobikisi na ngai agúmbaki motó na Ye mpe  
akufakí;  
Ezipelo oyo efungwanaki emonisaki nzela  
Ya bisengo ya Likolo mpe mokolo ezangi suka.

<sup>64</sup> Mpe ntango Azalaki kobakema wana, kotanga makila mpe kokufa, ntango Agumbaki motó na Ye, mói eyokaki mpenza nsóni yango moko, mpo na kobwaka miso likolo na bikelamu ya kufa oyo Nzambe asalaki na elili na Ye, esengelaki áfuta motuya ya ndenge wana mpo na kosikola yango, mói eboyaki kobwaka miso na mabelé na ngonga wana. Sanza ekomaki na mobulungano mpenza kino emilongolaki na esika na yango. Mpe minzoto epesaki mokongo na yango na mabelé. Likambo ya

nsomo nini oyo lisumu ezali! Ndenge Nzambe asengelaki kotala likambo na yango!

<sup>65</sup> Mpe kotala banganzambe wana kotiola, ná nsói kotanga na elongi na Ye. Mobali moko abetaki Ye na motó, na nkékélé, mpe alobaki, “Soki Ozali Mosakoli, yebisa biso nani abeti Yo.” Moko na bango abendaki mandefu na elongi na Ye, amamolaki Ye mbata, mpe alingaki ete Amibundela Ye moko mpenza.

<sup>66</sup> Alobaki, “Soki Bokonzi na Ngai ezalaki ya mokili oyo, Nalingaki kobenga Tata na Ngai mbala moko, Alingaki kotindela Ngai mapinga zomi na mibale ya banje.”

<sup>67</sup> Makambo ekokaki kobongwana, kasi Akokaki kosala yango ndenge nini? Akokaki kosala yango te, mpamba te ezalaki bana na Ye moko nde bazalaki kosenga Makila na Ye. Bokoki kokanisa papa moko, tata moko, ná bana na ye moko (kati na molili) bazogánga mpe kosenga makila ya tata na bango moko? Yango nde ntina oyo Akokaki kosala eloko mosusu te bobele kokufa. Soki Ásalaka yango te, mbele esilaki mpo na bana na Ye, mbele esilaki mpo na bikelamu. Kasi Asengelaki kokufa, mpo na kobikisa bato na Ye.

<sup>68</sup> Mpe ntango Akufaki, ntango Agumbaki motó na Ye, mabelé ya kala oyo ezuaki kotetemeka moko kokita na mokongo na yango. Esengeli kozala ete ezuaki mpenza koningana moko ya botuku, mpamba te Biblia elobi ete “mokili mobimba kobanda na ngonga ya motoba kino na ngonga ya libwa, ezalaki molili, ezalaki likolo ya mokili mobimba.” Mpe mabelé eninganaki, mpe mabanga epasukaki. Mpe ezipelo ya tempelo epasukaki longwa na likolo kino na nsé; mabanga ya etumbelo ya mbeka ebalukaki. Mwana na Nzambe na bomoi akufaki. Akufaki mpenza kino mói eyebaki yango. Akufaki mpenza kino sanza eyebaki yango. Akufaki mpenza kino minzoto eyebaki yango. Akufaki mpenza kino mabelé eyebaki yango. Akufaki mpenza kino bizali nyonso eyebaki yango, mipepe ya likolo eyebaki yango. Makambo nyonso esengelaki koyeba ete oyo wana azalaki Mwana na Nzambe! Mpamba te, Liloba na Nzambe ekokaki kokweya te, Alakamaki, longwa na elanga na Edene, “Momboto oyo ekonyata motó ya nyoka.”

<sup>69</sup> Sikoyo eloko nini ekomelaki Ye? Akendeki wapi ntango Atikaki ekulusu mpe akendeki na nkunda ya Yosefe ya Alimataya?

<sup>70</sup> Azalaki mpenza mobola na lolenge ete Azalaki na esika ya kotia motó na Ye te. Abótamaki na elielo ya bibwele, ná nkombo ya nsoni sima na Ye, lokola “mwana ya makángo.” Asekamaki, atiulamaki, atukamaki, awa na mokili. Atiulamaki mpe aboyamaki. Mpe ntango Akufaki, Asengelaki kokufa na etumbu ya liwa, katikati ya miyíbi mibale. Mpe Azalaki ata na esika ya kokundama te, mpe Akundamaki na kunda ya moto mosusu. Nzambe ya Lola mpenza ayaki na mokili! Bisó

tokanisaka tozali ba nani, wana esengeli na biso koleka na mwa mpasi moke? Oyo Ye asalá mpo na biso! Kanisa yango naino, moninga, yekola yango.

<sup>71</sup> Sodá ya Roma alobaki, “Ya solo, oyo azali Mwana na Nzambe.” Mosumuki asengelaki koyeba yango. Yuda alobaki, “Ngai nakabi Makila masali mabe te.” Esengelaki áyeba yango. Mokili mobimba eyebaki yango.

<sup>72</sup> Na boye Akendeki nde wapi? Ntango moto akufi, yango nde esukisi likambo yango? Te, mesie. Asengelaki kokufa lolenge wana mpamba te Biblia ya Nzambe elobaki ete Akokufa ndenge wana. Mpe Atielaki Liloba na Nzambe motema. Yango nde ntina oyo Akokaki koloba, na bomoi na Ye, “Bóbuka tempelo oyo, mpe Nakotelemisa yango na mikolo misato.”

<sup>73</sup> Mpamba te Dawidi alobaki, esika moko, bobele, na Biblia, na nsé na mpemela, ntango Dawidi, moto na Nzambe, mosakoli oyo apakolamaki na Liloba, alobaki, “Nakotika Mobulami na Ngai komona kopola te, mpe nakotika elimo na Ye na ewelo te.”

<sup>74</sup> Yesu alobaki, “Bino bóboma nzoto oyo, mpe Nakotelemisa yango na mikolo misato.” Ayebaki ete Liloba na Nzambe ekokaki kokweya te. Oh, oh!

<sup>75</sup> Soki Akokaki kopema na kimia nyonso, kondima ete Liloba na Nzambe ekoki kokweya te, boni boni koleka tokoki kopema mpenza wana esili biso kobotama mbala ya mibale na Molimo Mosanto, mpe Yango ezali litatoli na mitema na biso sika-sikawa, na lolenge ete toyebi ete Mosikoli na biso azali na bomoi mpe akoya lisusu mokolo moko. Pémá na etingia mpenza ete baoyo bazali kati na Klisto Nzambe akoyeisa bango elongo ná Ye! Sikawa bótala.

<sup>76</sup> Tala Ye wana. Ayebaki ete momboto moko te ya nzoto wana ekobeba. Na ngonga ntuku nsambo na mibale, kopola ekótaka kati na yango. Yango nde ntina oyo Atikálá kuna ata moke te mikolo misato. Akufaki mokolo na Mitano sima ya nzanga, abimaki mokolo na Lomingo na ntongo. Kasi, ezalaki na kati ya mikolo misato yango. Na kati ya mikolo misato wana Asengelaki kosekwa lisusu, mpamba te Atielaki Liloba na Nzambe motema.

<sup>77</sup> Tala Ye oyo akei! Epai wapi Ye akendeki ntango Alongwaki? Biblia elobaki, “Abutaki. Akendeki mpe ateyaki na milimo oyo ezalaki kati na boloko, oyo ebongolaki mitema te ntango ya motema molai ya mikolo na Noa.” Elimo na Ye, Molimo na Ye, theophanie na Ye oyo ya bomoto na Ye moko, akitaki. Tólanda Ye. Bokolinga ete tolanda Ye, mpo na miniti moke, na mpokwa oyo? Tika ete tótala epai wapi Akendeki.

<sup>78</sup> Bobele na nsé na bifandelo ya bikelamu ya liwa ezali na mosándá oyo ya nguya ya zabolo; na nsé na yango. . .likolo na yango milimo na bazangi sembo; na nse ezali efandelo mpenza ya Satana, lifelo. Na bongo kaka likolo na biso ezali Molimo Mosanto; bongo na nsé na Etumbelo ezali na milimo

ya bayengebeni; oyo elandi ezali Nzambe Ye moko. Moko ezali kokita na nse, moko ezali komata na likolo; milimo yango mibale ezali awa na mabelé, kokambáká bomoi na bato na mokili.

<sup>79</sup> Mpe ntango Yesu akufaki, Ye amati likolo, kuna na nsé. Nakoki komona Ye mokolo ya Mitano wana, sima ya nzánga, sima ya liwa na Ye, [Ndeko Branham abeti na eteyelo—Mok.] kobeta na ekuke ya bisika ya babúngi. Tólanda Ye mwa miniti moke. Ekuke efungwami. Basi bazalaki kuna, mibali bazalaki kuna, bilenge basi bazalaki kuna, mibange bazalaki kuna, bazalaki bango nyonso elongo na esika ya nsomo wana oyo ebiangami boloko ya milimo ebungi.

<sup>80</sup> Soki nazalaki na ntango, nalingaki koyebisa bino. Mpe ekokaki kozala na yango bobele emononeli. Kasi ntango moko nakendeki na esika wana, mpe nagángaki mpo na kosenga mawa, ntango nazalaki mosumuki basalaki ngai lipaso moko. Ntango nabimaki na yango, nazalaki ya kotelema na Westi, ná maboko na ngai etombwami na Likolo, mpe ekulusu moko ezalaki kongenga likolo na ngai.

<sup>81</sup> Kasi na esika wana ya mawa, Yesu ayaki na ekuke. Eloko nyonso esengelaki kotatola ete Azalaki Mwana na Nzambe, mpo ete bateyamaki na ntango ya motema molai ya mikolo na Noa. Abeti na ekuke, Alobi, “Ngai nazali Ye Oyo Enoka alobelaki. Nazali momboto ya mwasi oyo asengelaki koniata motó na nyoka. Liloba na Nzambe moko na moko esili kokokisama; Nauti kokufa kuna na Kalvari, mpe Nasili kosomba Lingomba na ngai. Mpe Oyo Enoka alobelaki, Ngai nazali Ye.” Mpe bazalaki wana bazangi mawa, bazangi elikya, mpo babukaki mobeko. Mpe ekuke ekangamelaki bango na elongi.

<sup>82</sup> Kuna mpenza na bifandelo ya ba zabololo! Kuna mpenza na bikuke na lifelo! Abeti na ekuke. [Ndeko Branham abeti na eteyelo—Mok.]

<sup>83</sup> Oyo ezali ntango Azalaki kati na nkunda, nzoto na Ye ezali, kozela lisekwa. Akendeki kotambola bisika oyo bayengebene mpe bazángi-boyengebene bakendeke; epai oyo okokende moko na mikolo oyo, na moko to na mosusu na bisika yango.

<sup>84</sup> Mpe Abeti na ekuke ya lifelo. [Ndeko Branham abeti na eteyelo—Mok.] Mpe, ntango Abetaki, zabololo abimaki. Mpe nakoki mpenza koyoka ye koloba: “Oh, boye sukasuka Okómi. Nakanisaki mpenza ete nazwaki Yo ntango nabomaki Abele.”

<sup>85</sup> Bomoni, ntango Momboto wana elakamaki na elanga na Edene, zabololo alukaka ntango nyonso kobebisa Momboto wana. Mpe liwa ya Abele, mpe boyéi ya Sete, ezalaki bobele kufa, kokundama, mpe lisekwa ya Klisto. Momboto yango esengeli kokoba. Mpe amekaki koboma Yango.

<sup>86</sup> Alobaki, “nakanisaki ete nazwaki Yo ntango nabomaki Abele. Nakanisaki ete nazwaki Yo ntango nabomaki basakoli. Nazalaki na kondima mpenza ete nazwaki Yo ntango nakataki

Yoane nkingo. Kasi sikawa, sima na nyonso, Okómi. Nazwi Yo sikawa.” Oh, oh!

<sup>87</sup> Nakoki koyoka Ye koloba, “Satana, yaka awa!” Azali Mokonzi sikoyo. Asemboli loboko, akangi bafungola ya kufa mpe ya ewelo longwa na loketo na ye, atii yango na loketo na Ye moko. “Nalingi kokebisa yo. Osili kosala maseki ntango molai mpenza. Ngai nazali Mwana na Nzambe na bomoi oyo abotámi na mongondo. Makila na Ngai ezali naino kotanga na ekulusu, mpe nyongo mobimba esili kofutama! Ozali lisusu na makoki moko te. Osili mpenza ngala. Mpesa Ngai bafungola wana!” Ezali solo. Abaluki mpe apupoli ye lokolo malamú mpenza, mpe akangi ekuke makasi, mpe alobi, “Tikala na kati kuna! Ngai nde Mokonzi kobanda ngonga oyo.”

<sup>88</sup> Sikawa, Azalaki na bafungola ya Bokonzi te, mpo Apesaki yango na Petelo; tokolobela nyonso wana na ntongo, na libatizi ya mai. Kasi azalaki na bafungola ya kufa mpe ya ewelo, mpe Akamataki yango; sima na lisekwa na Ye, Alobaki, “Nazali na bafungola ya kufa mpe ewelo.” Petelo azalaki na bafungola ya Bokonzi. Satana azalaki na bafungola ya kufa mpe ewélo; kasi sikawa Yesu azali na yango, Azali Mokonzi.

<sup>89</sup> Tala Ye oyo abandi komata. Pasika ekomi kobanda; ntango ezali koleka noki. Kasi ezali na etonga mosusu. Yobo azali wapi? Abraham azali wapi? Bazali wapi? Wapi bandeko oyo batielaki Liloba na Nzambe motema? Abosanaki nde bango? Kufa esilisaki bango kosilisa? Nde nyonso oyo yango ezalaki? Ata moke te, ata moke te; Nzambe asengelaki kobatela Liloba na Ye.

<sup>90</sup> Nakoki komona Ye. Tika ete tobwaka liso moke na Paradiso, mpe tótala kuna. Mpe nazali komona Sara mpe Abraham kotambola tambola kuna, mpe sima na mwa ntango [Ndeko Branham abeti—Mok.] eloko moko ebeti na ekuke. Abraham akei mpe afungoli ekuke, alobi, “Cherie, yaka awa. Tala awa! Tala awa, ezali mpenza Ye oyo atelemaki ná ngai na nsé na nzete monene yango mokolo wana.” Azali Nzambe na Abraham.

<sup>91</sup> Kaka na ntango wana nakoki komona Daniele kotala likolo na lipeka na ye, mpe koloba, “Yango nde Libanga oyo elongwaki na ngomba, kaka mpenza ndenge natelemi awa.”

<sup>92</sup> Namoni Yobo kotelema, alobaki, “Oyo wana nde Mosikoli na ngai oyo nalobaki ete ngai nayebaki ete azalaki na bomoi, mpe mokolo moko Akotelema na mabelé. Nzoto na ngai ekoki kozala bobele mwa lútu ya mputulú ya mabelé, kasi na miníti zomi na mitano kobanda sikawa, nakozala kati na yango lisusu. Wana ezali Ye.”

<sup>93</sup> Ezekiele atali na ngambo ya likolo, mpe alobaki, “Nazomona Moto yango moko lokola Eyika na kati na Eyika, ezali kobaluka, kuna likolo na mipepe.” Oh la la!

<sup>94</sup> Na sima Enoka ayaki. Enoka alobaki, “Namonaki Ye koya na ba-nkoto zomi ya basanto na Ye, mpo na kokokisa kosambisama.”

<sup>95</sup> Basanto ya kondimana na Kala bazalaki kozela, solo mpenza, bazalaki wana, na nsé ya mbondi ya makila. Bakokaki kokende te na liboso na Bozali na Nzambe, Nzambe na Lola, mpo ete makila ya ntaba mpe ya mpate ekokaki kolongola lisumu te.

<sup>96</sup> Kasi Alobaki, “Bandeke na ngai, Ngai nazali Ye oyo bokanisaka ete Ngai nazali. Nazali Momboto ya mwasi. Nazali Mwana na Dawidi. Nazali Mwana na Nzambe. Nazali Ye oyo abotami na mongondo. Makila na Ngai esili kosala mbondi mpo na yango. Bozalaki kozela na nsé na makila ya mpate mpe ya bantaba, kasi sikawa Makila na ngai elongoli masumu, mpe bokomi nsómi. Tika tómata, Pásika ekomi pene na kokóma.” Bókanisa naino, yango ezalaki kaka pene na mibu nkoto moko na nkama libwa koleka, na mpokwa oyo.

<sup>97</sup> Nakoki koyoka Abraham koloba, “Nkolo, ntango tokobima na nzoto na biso lisusu; mpe Sara ná ngai tolingaki yango mingi mpenza. Okosepela soki tokotelema mwa moke kotala-tala na lombangu, wana ozali kokóba nzela na Yo?”

<sup>98</sup> Boye, nakoki koyoka Ye koloba, “Ee, te, ata moke te. Nakozala elongo ná bayekoli na Ngai pene na mikolo ntuku minei. Bótala zingazinga mpe bómona lolenge makambo nyonso ezali komonana!”

<sup>99</sup> Na ntongo ya nkembo wana ya Pasika (epai wapi tokobandela na ntongo, soki Nkolo alingi) ntango Asékwaki na bakufi, Biblia elobaki, kokokana na Santu Matai 27, ete “Mingi na basantu oyo balalaki kati na putulú na mabelé, basekwaki mpe babimaki na malita.” Ezalaki nani? Abraham, Isaka, Yakobo, Yobo, baoyo na nzela na emoniseli emonisami ya molimo, bayebaki ete Mosikoli akotelema na mabelé mokolo moko. Ezali nde bango, ba-mbuma ya liboso ya baoyo bazalaki kolala. Tala bakotaki kati na engumba. Nakoki komona Sara ná Abraham, elenge, mpe atondi na . . . mpe bonzégá, mpe—mpe atondi na bomoi, bompaka ekozala lisusu ata moke te, bokono ekozala lisusu ata moke te, nzala lisusu ekozala ata moke te, bazalaki kotambola na nzoto na bango.

<sup>100</sup> Kayafa atelemaki wana, alobaki, “Oyebi nini? Ezalaki na eloko moko ekomaki mokolo mosusu wana, tala mobulungano tempelo oyo ezali kati na yango! Ezali na . . . Tokosengela kozua moto moko mpo na kotonga ezipelo wana. Bótala etumbelo ya mbeka ndenge ebaluki. Likambo nini ekomaki? Mobali wana azalaki nde moyekoli na minzoto? Azalaki nde ndoki? To, likambo nini ekomaki? Yo! Yaka awa, Josephus, bilenge babalani wana batelemi kuna bazali ba nani?”

Abraham alobaki, “Sara, toyebami. Ekozala malamú tóbima.”

101 “Bamonanaki na ebele!” Wana ezalaki suka na yango te. Mpo na kosukisa, bótala. Mokolo moko, wana sima na Ye ko... basilaki kotala; Abraham, Isaka, Yakobo, mpe baoyo nyonso basilaki kotala mboka na bango. Ntango Yesu amataki...

102 Okoloba, “Ndeko Branham, ezali nde lisapo?” Te, misie! Nakolakisa yo kati na Makomi, na miniti moke.

103 Ntango Abandaki komata, bamonaki bobele Ye, kasi bandimi ya Kondimana na Kala bakendeki elongo ná Ye, mpamba te Biblia elobaki ete “Akambaki ebele na bakangami, mpe apesaki makabo epai na bato.” Mpe nakoki komona Ye wana Azalaki komata, mpe amisangisi ná lingomba na Ye.

104 Banje mibale ya etonga yango, oyo bazalaki kobeta miziki, bazongaki wana, mpe balobaki, “Bino mibali na Galilai, mpo na nini botelemi kotala na likolo? Mpamba te Yesu moko, oyo akamatamaki na likolo, akoya lisusu.” Ya solo mpenza! Bakendeki na lombangu komibakisa na molongo yango.

105 Mpe tala kati na mipepe na likolo Yesu mpe basantu ya Kondimana na Kala bakendeki. Balekaki sánzá, balekaki mói, balekaki minzoto. Mpe ntango bakomaki liboso na Lola monene wana, ya pembe mpe kitoko, basantu ya Kondimana na Kala bagangaki, bazalaki kotánga Makomi, “Botombola, bino bikuke na seko, mpe bótombola mitó na bino! Bótombola, bino bikuke na seko, mpe bótombola mitó na bino! Mpe bótika Mokonzi na Nkembo ákota!”

106 Banje nyonso basanganaki likolo na sámbá na balazani ya Lola, mpe balobaki, “Nani Mokonzi yango na Nkembo oyo?”

107 Basantu ya Kondimana na Kala balobaki, “Yawe na bibebe, oyo na nguya kati na etumba! Azalaki Molóngi!”

108 Mwanje afináki butó monene, mpe bikuke ya pauni efungwamaki polele.

109 Mbala moko kolongwa na Éngumba ya Yelusaleme, Molóngi monene ya nguya, ayaki elongo ná basantu ya Kondimana na Kala. Lipinga na bayembi ya banje bazalaki kobeta miziki, wana banje bazalaki kogánga. Azalaki Molóngi na nguya! Azalaki na bafungola ya kufa mpe ya ewelo na loketo na Ye, aleki mbala moko na ba-ndako mokonzi ya Nkembo kino Akomaki na Ngwende. Mpe Alobaki, “Tata, tala bango oyo. Bandimaki, na kondima Liloba na Yo, ete Nakoya mokolo moko. Nasili kolónza kufa ná ewelo nyonso mibale.” Ezalaki nini, ndeko mobali? Azalaki na bilembo ya mpota na loboko na Ye, mpo na kolakisa ete Azalaki kati na etumba. Nkembo na Nzambe na Bisika bileki Likolo! Azali Molóngi na nguya wana! “Tala bango oyo, Tata; Abraham, Isaka, mpe Yakobo.”

110 Nakoki koyoka Ye koloba, “Mwana, matá awa pembeni na Ngai, mpe fanda kino Nakokómisa banguna nyonso etielo ya



makolo na Yo.” Ndeko, mokolo moko Akoya lisusu, mpe mokolo nini oyo mpenza yango ekozala!

<sup>111</sup> Afandaki kaka bongo te ntango Azalaki kati na nkunda. Tokanisaka ete azalaki na Ye kaka kolala wana, ya kokufa. Kasi Azalaki kuna na nsé kokóba kolónge, Akitaki kuna na nsé mpe azwaki bafungola na loboko ya Satana, Azali na bafungola ya kufa mpe ewelo, na mpokwa oyo. Alobaki, “Mpo Ngai nazali na bomoi, bino mpe bokoki kozala na bomoi.”

<sup>112</sup> Nazali komituna na mpokwa oyo, ndeko na ngai molingami ya mobali, ndeko mwasi, osili kokanisa likambo yango na bosembo nyonso? Bozali koyeba ete bozali na bomoi kaka mpo Ye azali na bomoi? Bosepeli na yango mpenza mpo na komipesa bino moko, mpe koloba: “Nzambe, ngai oyo, mosumuki, yokela ngai mawa?” Botikálá kondima Mbeka oyo ekoki mobimba? Botikálá koyebisa Ye ete bosilá kolinga Ye? Esalaka bino mpasi ntango bozosala mabe? Soki otikálá kobikela likambo yango te kino sikawa, na bokundami oyo! Ntango, ntango na biso ezali koleka noki. Tozomiyoka kaka malamú! Kasi, nazomituna, soki otikálá koyamba Klisto te lokola Mobikisi na yo, nazomituna soki okolinga kosala yango wana togumbi mitó mwa moke mpo na liloba moko ya libondeli.

<sup>113</sup> Beta yango, *Kati Na Lokito Ya Kopasuka Ya Mabanga*, soki okolinga, Ndeko mwasi Gertie, soki ozali na yango. Malamú, nyonso ekozala na yango malamú.

<sup>114</sup> Wana bogumbi mitó, nakotuna bino motuna moko ya sembo mpenza. Bóbosana te baninga, mosumuki to mosantu, bomoi na yo osuki te na ntango tokundi yo. Elimo na yo ezali esika moko. Sikawa, Yesu akendeki na bisika nyonso mibale yango, kokokana na Makomi. Epai nini Ye akozwa yo soki esali ete okei na mpokwa oyo? Okolinga ete ekuke ya ngolu ékangama liboso na elongi na yo, mpo yo oboyaki? Bómikanisela, Azali kaka Mobikisi te, Azali Mosambisi. Ozali mosambisi na ngonga oyo, ozali kosambisa Ye ndenge nini? Tika ete Ye ázala Mobikisi na yo sikoyo.

<sup>115</sup> Mwa lisolo eyei na makanisi na ngai. Eleki ntango molai te mwana moke moko ya mobali azalaki kofanda kati na—na likalo. Bondóki moko ebetaki na balabála, mpe mpunda ekimaki, azalaki kokende kobaluka na lobwaku moko. Elenge mobateli-ngombe moko apotaki mbangu mpe atelemisaki bampunda yango kaka liboso ete likalo yango ekwea na lobwaku monene yango, mpamba te ezalaki na mwana moke na kati na yango. Abikisaki bomoi ya mwa mwana moke yango.

<sup>116</sup> Mibu ebele sima na yango, atelemaki na ndako ya esambiselo. Mwana mobali yango moko asalaki mbeba, azwaki nzela mabe, akweisamaki. Azalaki komela masanga, kosakana na mbongo, abetaki moto moko lisasi; mpe akweaki na likambo, azwamaki na likambo. Mpe zuzi atelemaki mpe alobaki,

“Nakateli yo etumbu ete ókangema nsinga na nkingo kino kufa ékumba bomoi na yo.”

117 Elenge mobali wana alobaki, “Zuzi!” Mpe akataki etamboli ya esambiseli, wana apombwaki liboso mpe akweaki na makolo ya zuzi, kosenga mawa. Alobaki, “Zuzi, tala elongi na ngai! Oyebe ngai te?”

Alobaki, “Te, mwana, nayebi yo te.”

118 Alobaki, “Oyebe lisusu bomoi ya mwana mobali moko oyo obikisaki, eleki mibu ebele, na mpunda moko ezalaki kokima?”

Alobaki, “Iyo, nazoyeba yango lisusu.”

119 Alobaki, “Nazali mwana mobali yango.” Alobaki, “Zuzi, obikisaki ngai kuna. Bikisa ngai sikawa!”

120 Zúzi atalaki ye, mpe alobaki, “Mwana, mokolo wana nazalaki mobikisi na yo. Lelo oyo nazali zúzi na yo.”

121 Lelo Azali Mobikisi na yo, mosumuki, lobi Akoki kozala Zuzi na yo. Tókanisa likambo yango sikawa, wana mizíki ezali kobeta. Mpe bato nyonso bazali kobondela, baoyo bazali na esika ya kobondela elongo ná Nzambe.

122 Nazomituna na mpokwa oyo sikawa, nokinoki, baoyo bakolinga koyamba Klisto lokola Mobikisi na bango moko, loba: “Nzambe, yokela ngai mawa, ngai mosumuki. Nalingi koya na Makila oyo esopanaki. Nalembi kokóta-kota mangomba mpe kokima esika na esika. Nalingi kobotama mbala ya mibale. Nalingi kobikela likambo na motema na ngai ete nayebi ete Klisto asili komimonisa Ye moko epai na ngai, na nzela na emoniseli ya molimo, oyo outi kolobela, Ndeko Branham. Nalingi emoniseli ya molimo, Molimo Mosanto kati na motema na ngai, kozalisa ngai na bomoi, kokómisa Klisto solo epai na ngai koleka ndenge nazali epai na ngai moko. Nazali na mposa ya kobikela yango, Ndeko Branham. Okolinga kobondela mpo na ngai wana natómboli loboko?” Okolinga kotombola loboko sikawa, oyo alingi ete ákanisama. Nzambe ápambola yo, madame. Nzambe ápambola yo kuna na sima, madame. Ezali malamú. Nzambe ápambola yo, misié. Ezali malamú. Bótombola maboko, sikawa bótelema na loboko elongo.

123 Ndenge nini okoyoka nsoni? Okoboya nde likambo ya ndenge Wana, moninga? Mikaniséla.

124 “Oh,” okoloba, “Ndeko Branham, batei basili koteya mibu ebele.” Nayebi, kasi moko na mikolo oyo bakotika koteya. Mpe na ndenge makambo ezali komonana, ekoki kozala pe na ngonga oyo. Okoyoka liteya na yo ya suka. Na bosolo, oyo ekoki kozala ya suka mpo na yo.

125 “Oh,” okoloba, “Nazali elenge.” Wana ezali likambo te. Liwa eponaka moto te, mbula to makoki te.

126 Okolinga koyamba Ye lokola Mobikisi na yo moko, na kotomboláká loboko, koloba, “Nzambe, yokela ngai mawa”? Tombola maboko elongo ná baoyo mosusu batikalí, mpe loba, “Sikawa nalingi koyamba Klisto.” Okolinga kotombola loboko?

127 Moto moko oyo asili kozóngi sima, loba, “Nzambe, yokela ngai mawa. Nalingi kozonga epai na Klisto na mpokwa oyo, ete lobi ékoka kozala lisekwa, ya sika, mpo na ngai.” Okolinga kotombola maboko? Tombola loboko, loba, “Yokela ngai mawa. Nalingi sikawa koya.” Okolinga kosala yango? Tombola loboko, Loba, “Nazalaki mozóngi sima, kasi na mpokwa oyo...” Nzambe ápambola yo, madame Nzambe ápambola bino. Ezali malamu. “Nakoyamba Klisto lokola Mobikisi na ngai moko. Nakoyamba Ye na mpokwa oyo. Nayengá-yengaki, mbula ebele mosika na Nzambe, kasi sikawa nazali kozonga ndako.” Okolinga koyamba Ye na mpokwa oyo, mpo oyo ézala lisekwa ya sika mpo na yo, bomoi na yo ya kala ekoki kosila?

128 Mwasi oyo azali koya na etumbelo, mpo na koyambola makambo na ye, mpo na kotelema. Moto mosusu azali na mposa kozwa esika na ye awa, yaka awa elongo ná ye, likolo na eyambweli na bango? Okolinga kotelema, mpe koya awa na etumbelo, mpe lokola? Etumbelo ezali polele. Solo mpenza. Yaka mpenza awa, sika-sikawa. Soki olingi kotelema awa mpe kobondela, ekozala malamu. Yaka. Okolinga koya? Likolo na eyambweli ya kondima na yo, likolo na boyambi na yo ya Mwana na Nzambe, okolinga koya sikawa? Malamu.


129 Etali kaka yo, kobosana te. Yo nde moto yango. Ozali mosumuki? Ozali mozóngi sima? Ozali moto ya malili mpe mosika na Klisto? Mpe olingi kosekwa na bomoi na sika elongo ná Ye sikawa, kobanda bomoi ya sika? Bino ndenge nini, mobali ná mwasi oyo bozali ko—bozali kopotana eleki ntango molai, koswana-swana na ndako na bino? Bokolinga te koya mpe kosembola likambo yango ná Nzambe mpe bino na bino sikawa? Komisa Pásika mpenza Pásika moko mpo na yo, banda libota ya sika.

130 Ndenge nini mpo bino baoyo botikalá naino te, botikalá ata kozala na mabondeli na ndako na bino te, bozongaka kaka ndako longwa na losambo mpe bomekaka kobika bomoi malamu koleka kaka na ndenge bokoki, kasi botikalá kosangisa libota elongo te mpe kobondela? Yango nde ntina oyo tozali na bana oyo matoi eleki motó ná makambo tozali na yango. Yango nde ntina oyo mabota ya Amerika epanzani-panzani. Bokolinga koya te, kobandela lisusu na mpokwa oyo? Bokolinga kosala yango? Bobiangami. Bomikanisela, nazali motei na bino sikawa; nakozala motatoli na mokolo wana.

Wana togumbi mitó, bongo, mpo na kobondela sikoyo.

131 Mopambolami Tata na biso na Likolo, na mpokwa oyo tomemeli Yo liyangani oyo, kati na lokumu nyonso ya bosanto

monene koleka na ndenge toyebi. Tobelemi na komikitisa na Ngwende na Yo. Mpe sima na Liteya ya mpokwa oyo, ete, bokundami monene wana, Alalaki na kimia ata moke te, elimo na Ye ekendeki mbala moko na bisika yango kuna mpe asilisaki mosala na Nzambe, oyo Ye abongisamaki mpo na kosala yango. Mpe lobi na ntongo, tomoni esika Alekaki na misanda ya likolo, kolóngáká makambo nyonso, kati na lisekwa na Ye. Kasi Abimaki na ntongo ya Pásika mpo na kolóngisama na biso. Mpe tomoni ete Azongisaki Molimo Mosanto, mpo na kondimisa bato na masumu.

<sup>132</sup> Mpe tozali kobondela na mpokwa oyo, Nkolo, ete baoyo batombolaki maboko na bango bákoka kokanisama lisusu liboso na Yo. Tika ete mokano na bango ézala longwa na motema na bango na mpokwa oyo, ete basili koyamba Yo, mpe bándimela Yo, mpe tika ete bátiamama Elembo ya elaka na mpokwa oyo, Molimo Mosanto. Kokisa yango, Tata. Mpo, totiki bango na maboko na Yo, ná Liteya oyo na mpokwa oyo. Tika ete Épambola baoyo bayoki Yango, baoyo, Nkolo, bakomema Yango elongo na bango na ba-ndako na bango, mpe zindisa Yango na bozindo mpenza na mitema na bango. Tika ete bábika na Liloba na Nzambe. Kokisa yango, Tata, mpo tosengi yango na Nkombo na Klisto. Amen. 

*BOKUNDAMI* LIN57-0420

(The Entombment)

MAYANGANI YA KOLAMUKA YA PASIKA

Liteya ya Ndeko William Marrion Branham oyo, eteyamaki liboso na Anglais Mokolo mwa Mposo na mpokwa, na mokolo ya 20 sanza ya Minei, 1957, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)